



Na suđenju Srpku Pustivuku, optuženom za zločine počinjene u Ilijašu, svjedokinja Državnog tužilaštva ispričala je kako su joj otac i brat ubijeni ispred kuće u selu Gornja Bioča (općina Ilijaš), ali tvrdi da nije vidjela ko ih je ubio. Zaštićena svjedokinja S2 je kazala da joj je krajem maja 1992. godine otac, koji je ranjen kroz vrata kuće, umro u krilu, dok joj je brat izveden u dvorište i ubijen. “Moj otac je ubijen kroz vrata, koja je krenuo da otvori nakon što su naše komšije Srbi – vojnici tražili to. Dok je još bio živ prišla sam mu, molila sam vojnike da mu pomognu. Srpko mi je rekao da ga pustim, da od njega nema ništa. Otac mi je umro u krilu, imao je povredu sa desne strane grudi”, prisjetila se svjedokinja.

Svjedokinja, koja je tada imala 14 godina, ispričala je da je nakon što je pogođen njen otac kroz vrata, te ranjeno dvoje djece, u kuću ušao Pustivuk i još dvojica vojnika, ali da ona nije mogla vidjeti ko je pucao kroz zatvorena vrata. Svjedokinja je kazala da je prije pucnjave kroz prozor vidjela desetak nepoznatih vojnika.

“Moj brat je bio u drugoj prostoriji kad je ušao Srpko i još dva vojnika. Tražili su naoružanje. Brat je, nakon što je vidio da je otac pogođen, rekao Srpku da nema ništa, osim puške koju je držao u ruci. Srpko mu je odgovorio da će ako nađu više od ovoga, pobiti sve nas”, ispričala je svjedokinja. Ona se prisjetila da su dvojica vojnika potom izveli njenog brata, koji je tada imao 17 godina, i ubili ga. “Vani su ga izveli i svezali. Čula sam dva pucnja. Izašla sam i vidjela kako moj brat leži mrtav... Vojnici bježe niz njive”, kazala je svjedokinja, koja je iskaz dala iz druge prostorije jer joj je bilo “neugodno biti u istoj prostoriji sa optuženim”.

Svjedokinja je rekla da se ne sjeća ko je pozvao dvojicu vojnika da izvedu i zavežu njenog brata. Nakon toga joj je tužiteljica Vesna Ilić pročitala iskaz koji je u martu 2007. godine dala u Tužilaštvu BiH, a u kojem je navela da je to uradio Srpsko Pustivuk. Svjedokinja je rekla da je tačno to što je ranije izjavila. “Srpko je pozvao neku drugu dvojicu i rekao im da ga izvedu i svežu. Prethodno su ga razoružali”, kazala je svjedokinja u izjavi koju je dala Tužilaštvu BiH. Svjedokinja je odgovarajući na pitanja Odbrane potvrdila da je u izjavi koju je dala Tužilaštvu kazala da joj je optuženi Pustivuk neprijatelj, te da je učinio prema njoj “genocid”. Svjedokinja je istaknula da optuženog poznaje iz viđenja, ali da ne zna gdje je radio.

Na ovom suđenju, kao svjedoci Tužilaštva, saslušani su Ismet Durmić i Safer Hujić koji su ispričali da su ih komšije Srbi, nakon što su predali naoružanje, pritvorili prvo u školi, zatim u “Iskrin” magacin u Podlugovima a nakon toga u “Planjinu kuću” u Semizovcu.

Durmić je kazao da ga je optuženi Srpko ispitivao o naoružanju u školi, te da je bio korektan. Nastavak suđenja zakazan je za 23. august ove godine.

BIRN

[Preuzeto sa www.ilijas.ba](http://www.ilijas.ba)